

# «Quai sarà üna da las ultimas jadas cha nus ans vezzain»

Ida Fancoli quinta da la mort da seis bap – üna da las prümas victimas da Covid-19 in Engiadina

ANDRI NETZER/FMR

■ **Daspö il cumanzaint da la pandemia sun mortas in Svizra 10594 persunas causa il coronavirus. Tour cumgià d'üna persuna es pels relaschats eir uschigliö fingià greiv. Dürant la pandemia ston els fruntar amo plü grondas sfidas.** Intant cha inchüns discutan, scha propcha tuottas da quellas 10594 persunas sajan mortas pervi o «be» cul virus, sta davu mincha persuna ün agen destin e paraints in led. *Ida Fancoli* (64) da S-chanf ha vivü ün tal destin. Seis bap, Carmelo Fancoli, es mort als 28 da marz 2020 vi da Covid-19. El d'eira bazegner, bap ed ün dret «Brailoker», sco cha'ls abitants da Brail vegnan nomnats. In Engiadina d'eira'l ün dals prüms cas mortals dal coronavirus. La pandemia restrendscha a tuots e tuot i'l minchadi. Ella nu resguarda neir ils muaints ils plü strets e persunals, quels avant la mort. Tour cumgià d'üna persuna chara, tgnair seis man, branclar – tuot nun es plü pussibel.

## Ün ultim cumgià

Carmelo Fancoli vaiva 91 ons. Per si'età d'eira'l fich independent. Tuot quai chi d'eira pussibel, faiva'l sves – cuschnar, ir a cumprar aint, ir pro'l meidi, pajar quint. Sia figlia guardaiva però regularmaing dad el e til güdaiva ingio chi faiva dabsögn. Sco üsità è'la eir passada la saira dals 16 da marz 2020 a Brail per guardar da seis bap: «El vaiva survgni feivra e tuossiva. Ils dis seguaints n'haja lura adüna darcheu guardà dad el. Cun quai cha seis stadi nu's amegldraiva vaina fat gnir



Daspö il cumanzaint da la pandemia sun mortas in Svizra 10594 persunas causa il coronavirus. Pels relaschats üna sfida emoziunala ed organisatorica.

FOTO JONAS FOYN/CC BY 2.0

il meidi. Quel ha fat ün test da corona – positiv.» Per ella sco eir per seis bap d'eira la diagnosa ün schoc. El vaiva lura eir survgni fadia cul respirar e dovraiva oxigen. Insemel culs confamiliars ha Ida Fancoli lura decis da til manar a Samedan a l'ospidal: «Surdar a meis bap i'ls mans dals meidis d'eira per nus duos sco il mu-

maint da tour cumgià. Tant eu sco el saivaivan cha quai sarà üna da las ultimas jadas cha nus ans vezzain.»

## Schi nu's po esser dastrusch

La spranza chi pudess tantüna gnir meglider vaiva Ida Fancoli però istess adüna. Ils prüms trais dis nu paraiva il stadi da

seis bap d'esser uschè mal. Lura es però gnü il telefon da l'ospidal: «Els m'han dit chi nu guard'oura bain e dumandà sch'eu til less verer amo üna jada. Cur ch'eu d'eira pro el in stanza, m'ha'l dit chi nu til giája bain. El d'eira stanguel e durmiva fich bler.» In sonda, ils 28 da marz 2020 es seis bap lura s'indurmanzà per adüna.

Cuort davu sia mort til ha Ida Fancoli amo pudü verer ün'ultima jada. Ma sco eir pro las visitas ouravant stuvaiva tuot capitar adüna suot masüras da sgürezza fich severas – dischinfetar, büschmainta da protecciun ed ingün contact da pel. «I d'eira fich trist chi nu's pudaiva esser dastrusch per tour cumgià. Quella distanza sforzada faiva mal perquai chi's vould esser là, accompagnar, charrezzar e dar a la persuna chi sto ir tuot il cuffort pussibel», disch Ida Fancoli.

## Forza per superar

Tuot otras difficultats ha portà l'organiziun dal funeral. Dasper la limitaziun da persunas nu d'eira neir pussibel d'organisar ün ravarenda. «Nus vain perquai decis da tscherchar sves ad inchün», disch Ida Fancoli e cuntinua: «Nus vain lura chattà ad ün ravarenda pensiunà chi d'eira pront da tgnair ün pèr peds per meis bap.» Ch'el sves nu vess bainschi na vulgü ün grond funeral, ma ella es persvasa cha blera gliud vess vulgü tour cumgià dad el. Davu il funeral d'eira'la per ün temp amo occupada cun rumir l'abitaziun e cun diversas robas organisatoricas. In üna foura è'la perquai crodada pür plü tard. Ella vaiva blers ons guardà da seis bap e til d'eira fich dastrusch. Tuot quai d'eira dandettamaing crodà davent. In quella situaziun tilla es però la pandemia gnüda incunter: «Causa ch'eu stuvaiva lavurar i'l 'homeoffice' vaiva daplü temp per mai. Quai m'ha dat darcheu energia e forza per superar quai chi'd es capità.» Ün cuffort d'eira per ella eir cha seis bap d'eira cuntaint cun sia vita ed ha pudü star fin a la fin in sia chasa.

## ENGIADIN'OTA

### Stagiun da passlung extraordinaria

(rtr/fmr) L'ultima dumengia da l'avrigl es ida a fin la stagiun da passlung in Engiadin'Ota. Grazcha a la bgera naiv e las temperaturas bassas, hegian els pudieu preparar las ultimas loipas: Scu cha'ls respunsabels scrivan in lur comunicaziun, saja la stagiun passada steda extraordinaria. Melgrò la manchaunza da giasts internaziunels, hegian els nempe vendieu dapüs biglietti da loipa congualo culs ans aunz. Que vala eir per tuot la Svizra: La societad Loipen-Schweiz ho realiso ün an da record. Scu cha'ls respunsabels haun dit invers SRF, hegian els gieu entredgias dals pass da loipas da tuot la Svizra da 6 milliuns francs – 48% dapü cu l'an aunz.



### Portavusch da la Rumantschia

Abunai gist uss «La Quotidiana» e Vus retschavais la carta da «abopius» che cuntagna ina plivaleta. Cun questa carta profitais Vus da numerusas reducziuns. L'entira purschida chattais Vus sut: [www.suedostschweiz.ch/somedia/abopius](http://www.suedostschweiz.ch/somedia/abopius)

Somedia, servetsch d'abo e servetsch da lecturs  
Sommeraustrasse 32, CH-7000 Cuir  
Telefon 0844 226 226  
abo@somedia.ch

**LA QUOTIDIANA**

## Prüm concert davu la schloccada da corona

Il Trio Rodas ha concertà illa baselgia a Sent

BENEDICT STECHER/FMR

■ **Davu üna lunga posa pervi da las restricziuns dal coronavirus ha gnü lö d'incuort il prüm concert cul Trio Rodas illa baselgia San Lureuch a Sent. Corin Curschellas, Patricia Draeger e Barbara Gisler han preschantà üna cumbinaziun da chanzuns rumantschas e tudaischas.** Davu cha tuot ils concerts dal Trio Rodas sun gnüts revochats daspö il marz 2020 han ils preschaints a Sent pudü gio-dair d'incuort üna sairada cun ün program fich varià. Las chanzuns rumantschas e tudais-chas sun gnüdas preschantadas in möd natüral e cun accompagna-maint musical decent ed adattà a la vusch

da Curschellas. Il Trio Rodas consista da Corin Curschellas (chant e dulcimer), Patricia Draeger (accordeon) e da Barbara Gisler (cello). Üna composiziun d'instrumentals plüost insolita chi'd es però adattada per as preschantar ad ün concert sainza blera tecnica ed amplificaziun. Unic la vusch da Curschellas d'eira sustgnüda cun ün amplifichadur simpel chi nu falsifichava la vusch da la chantadura. Las instrumentalistas han tut resguard al chant ed adattà las chanzuns in möd subtil e cun grond savair. Eir las decleraziuns da Curschellas tanter las chanzuns sun rivadas illa baselgia in möd amicabel, simpatic ed umoristic. Mincha seguond banc da la baselgia nu d'eira occupà ed ils preschaints

s'han tgnüts sainz'excepziun vi da las reglas dal coronavirus.

## Bleras chanzuns rumantschas

Il concert a Sent es gnü inizià cun üna chanzun cun text da Tista Murk da la Val Müstair chi descriva la vita dal pastur. Tanteraint eir chanzuns cun texts tudaischs in dialect svizzer. Üna da quellas descriva la vita a la staziun da la SBB a Turich cun scenas da salüd e d'arevair in möd melancolic. Ün'otra chanzun ün pa critica descriva la vendita da la patria e tanteraint: A l'ester, Donna donna ve a chà, Pasch da la saira e diversas otras. In bleras chanzuns haja dat parts musicalas chi han pussibilità improvisaziuns e mu-

ossà la grond'abilità da las instrumentalistas. La prosma chanzun tradiziunala Saira per saira: «Wo ma anders gspunna het wie hüt oft der Fall», ha dit Corin Curschellas. In baselgia nu d'eira uschè chod in möd ch'üna duonna ha trat aint sia giacca: «Cullas perscripziuns dal coronavirus e culla distanza pretaisa nu's poja dar chod ün a tsel e perquai fa la giacca segn», ha Curschellas muossà sia spontanità. Üna saira cun bleras bellas chanzuns chi han dat perdüta da la schelta richa da chanzuns chi sun gnüdas garnidas cun arandschamaints extraordinaris. Sülla pagina d'internet «Veranstaltungen Sent» sun indichats ulteriurs concerts chi han lö periodicamaing tuot on.



Il Trio Rodas in acziun illa baselgia a Sent.

FOTOS BENEDICT STECHER



Corin Curschellas ha chantà cun gronda e viva expressiun.